

Pengeluaran gas asli Malaysia naik 9.1%

PETALING JAYA – Pengeluaran gas asli Malaysia meningkat 9.1 peratus, merekodkan 799.8 bilion kaki padu pada suku pertama 2024 (ST1 2024), berbanding dengan 733.3 bilion kaki padu pada suku sama tahun sebelumnya, menurut Statistik Perlombongan Petroleum dan Gas Asli oleh Jabatan Perangkaan.

Ketua Perangkawan, Datuk Seri Mohd. Uzir Mahidin berkata, pengeluaran minyak mentah dan kondensat turun secara marginal bagi tempoh dua suku tahun berturut-turut sebanyak 0.5 peratus kepada 48 juta tong pada ST1 2024 (ST4 2023: -0.6 peratus; 49.1 juta tong).

“Penguncupan ini disebabkan kemerosotan sebanyak 5.8 peratus dalam pengeluaran minyak mentah kepada 33.2 juta tong (ST4 2023: -6.6 peratus; 34.6 juta tong), yang meliputi 69.2 peratus daripada jumlah keseluruhan.



MOHD. UZIR

“Namun begitu, pengeluaran kondensat kekal kukuh dengan pertumbuhan dua digit sebanyak 14 peratus berbanding dengan pertumbuhan 17 peratus pada suku sebelumnya.

“Bagi perbandingan suku tahun ke suku tahun, pengeluaran minyak mentah dan kondensat menurun 2.3 peratus berbanding dengan pertumbuhan tujuh peratus pada ST4 2023,” katanya dalam kenyataan semalam.